

清

史

稿

清史稿

列傳一百三十八

沈初

金士松

鄒炳泰

戴聯奎

王懿修

子宗

黃鉞

沈初字景初浙江平湖人少有異稟讀書目數行下同郡錢陳羣稱爲異才乾隆二十七年南巡召試賜舉人授內閣中書明年成一甲第二名進士授編修三十二年直懋勤殿命寫經爲皇太后祝釐逾年大考翰詹以直內廷未與試詔褒初學問優美特晉一秩擢侍講三十六年直南書房督河南學政未赴任丁祖母承重憂服闋遷右庶子累擢禮部侍郎督福建學政遭本生父憂服闋起兵部侍郎尋以母病乞歸終養後起故官督順天學政調江蘇任滿回京調吏部又督江西學政初以文學受知歷充四庫全書館三通館副總裁續編石渠寶笈秘殿珠林校勘太學石經嘉慶元年與千叟宴充會試知貢舉擢左都御史授軍機大臣遷兵部尙書歷吏戶二部四年以老罷樞務免直內廷充寶

錄館副總裁未幾卒諡文恪祀賢良祠

金士松字亭立江蘇吳江人寄籍宛平舉順天鄉試改歸原籍乾隆二十五年成進士選庶吉士授編修遷侍讀直懋勤殿寫經典福建鄉試督廣東學政直南書房累遷詹事以生母憂歸服闋會高宗南巡迎鑾道左回京督順天學政以寄籍辭詔免迴避聯任凡七年累擢禮部侍郎調兵部五十年帝御乾清宮賜千叟宴士松年五十七未得與特命試詩賞賚同一品調吏部直隸經筵校勘石經遷左都御史嘉慶元年再與千叟宴遷禮部尙書二年調兵部能直書房五年扈蹕謁裕陵途次嬰疾道御醫診視還京卒諡文簡祀賢良祠

鄒炳泰字仲文江蘇無錫人乾隆三十七年進士選庶吉士授編修纂修四庫全書遷國子監司業國學因元明舊未立辟雍炳泰援古制疏請四十八年高宗釋奠禮成因下詔增建辟雍逾兩年始舉臨雍禮稱盛典焉尋超擢炳泰爲祭酒累遷內閣學士歷山東江西學政嘉慶四年授禮部侍郎調倉場剔除積弊坐糧廳顏培天不職劾去之六年京察特予議叙軍船交糧掛欠已許抵補

後至者復然炳泰慮年年積欠與同官達慶意不合自具疏奏詔斥其偏執使
氣鏘級留任又奏監督輪值宿倉倉役出入滋弊宜令於倉外官房居住從之
十年擢左都御史遷兵部尚書兼署工部管理戶部三庫十一年兼管順天府
尹事十二年調吏部十四年加太子少保倉吏高添鳳盜米事覺坐久任倉場
無所覺察褫宮銜降二品頂戴革職留任久乃復之十六年署戶部尚書尋以
吏部尚書協辦大學士炳泰在吏部久尤慎銓政十八年銓選兵部主事有誤
同官瑚圖禮徇司員議迴護堅執炳泰力爭曰吾年已衰何戀戀祿位不可使
朝廷法自我壞自具疏白其故上聽其言卒罷瑚圖禮既而有降革官捐復者
二人準駁不當侍郎彭齡論與不合疏聞上斥炳泰無定見鏘級留任又盜
劫兵部主事姚堃於昌平八仙莊詔以地近京畿官吏聞葺不能治盜罷炳泰
兼管府尹事及教匪林清變起逆黨多居固安及黃村追論炳泰在官不能覺
察以中允贊善降補尋休致歸二十五年卒炳泰自初登第不登權要之門浮
沉館職久之始躋卿貳屢掌文衡稱得士立朝不苟仁宗重之而終黜

戴聯奎字紫垣江蘇如皋人乾隆四十年進士選庶吉士授編修聯奎少從邵晉涵受經學既通籍以清節自厲在翰林久不遷大學士嵇璜掌院事將保送御史列聯奎名滿掌院學士曰吾未識其人何以論其才否璜以語聯奎使往見聯奎漫應之不往及京察舉一等又列聯奎名復言如前終不得與璜乃益重之 and 坤爲掌院訪時望傳其子豐紳殷德或薦晉涵及聯奎晉涵移病歸聯奎亦堅辭循資累遷至內閣學士嘉慶九年遷兵部侍郎歷禮部兵部吏部二十一年擢左都御史逾年擢禮部尙書調兵部二十五年失行印坐降三品京堂補太常寺卿督浙江學政道光元年擢禮部侍郎又擢兵部尙書召還京未至卒

王懿修字仲美安徽青陽人乾隆三十一年進士選庶吉士授編修入直上書房授慶郡王永璘讀典陝西廣東江西鄉試督廣西湖北學政洵擢少詹事五十四年引病歸終父母喪始出復乞病在告嘉慶元年舉行千叟宴懿修與焉被御製詩刻玉鳩杖文綺之賜七年起授通政司副使歷光祿寺卿內閣學士

八年擢禮部侍郎督順天學政十年擢左都御史回京供職尋擢禮部尚書管戶部三庫事十二年充上書房總師傅十四年萬壽慶典加太子少保典會試懿修持躬端謹制作雅正甚被仁宗眷遇十八年以老致仕逾二年年八十賜壽謁宮門謝逢上出御經筵親解佩囊賜之二十一年卒諡文僖子宗誠字廉甫乾隆五十五年一甲三名進士授編修嘉慶中歷典雲南四川陝西鄉試督河南山東江西學政洊擢禮部侍郎歷工部兵部典會試道光二年擢兵部尚書歷署禮部工部尚書兼管順天府尹當懿修爲侍郎時宗誠已官學士尋隨父扈蹕東巡侍宴翰林院父子同席高宗實錄成賜宴禮部懿修以尚書主席懿修致仕後宗誠繼直上書房海內推爲榮遇上亦以其兩世官禁近皆能清慎特優暱焉道光十七年卒

黃鉞字左田安徽富埜人乾隆五十五年進士授戶部主事時和珅管部務鉞不欲趨附乞假歸不出嘉慶四年仁宗親政朱珪荐之召來京入見上曰朕居藩邸時知汝名久矣何以假歸不出鉞以質對荷濫諭尋直懋勤殿九年改贊

善入直南書房未補官命與考試差典山東鄉試十年督山西學政案遷庶子十五年差滿仍直南書房遷侍講學士十八年復典山東鄉試留學政擢內閣學士是年滑縣教匪起蔓延山東劾罷失察武生習教之荷澤訓導宋璇請卹擊匪陣歿之曹州學錄孔毓俊生員孔毓仲獎勵手禽賊渠之金鄉生員李九標十九年召回京仍內直擢戶部侍郎尋調禮部充秘殿珠林石渠寶笈續編總閱全唐文館總裁書成並邀賞賚復調戶部二十四年擢禮部尙書加太子少保二十五年命爲軍機大臣尋調戶部尙書鉞受仁宗特達之知久直內廷書畫並被宸賞習於掌故持議詳慎宣宗即位始畀樞務甚優禮之四年以年老罷直軍機累疏乞休六年始許致仕在籍食半俸二十一年卒年九十二贈太子太保諡勤敏

論曰國家優禮詞臣迴翔禁近坐致公卿沈初金士松高宗舊臣獲恩禮終王懿修父子同朝尤稱盛事黃鉞以不附和珅特邀殊遇改授館職馴參機務鄒炳泰戴聯奎皆有耿介之操晚節枯槁乃殊要不失爲端人焉

清史稿

列傳一百三十九

姜晟

金光悌

祖之望

韓崑

姜晟字光宇江蘇元和人乾隆三十一年進士授刑部主事累遷郎中擢光祿寺少卿轉太僕寺仍兼刑部行走四十四年出爲江西按察使逾年超擢刑部侍郎屢命赴各省按事讞獄五十二年授湖北巡撫時大軍征台灣晟運米十萬石濟餉需上嘉之予議叙五十三年荊州江隄潰命大學士阿桂等往勘以晟未能疏濬上游漲沙並坐屬吏婪索准鹽匣費褫頂帶尋召授刑部侍郎五十六年復出爲湖南巡撫芷江境失餉鞘久不獲晟捕首犯置之法洞庭湖盜董舒友等積年爲商旅害獲獲之傳首湖干盜風以靖六十年黔苗石柳鄧叛永綏苗石三保應之晟借總督畢沅往勦尋雲貴總督福康安來督師晟駐辰州治軍需分兵屯諸要隘緝獲奸匪百戶楊國安父子解京詔嘉其治軍鎮靜下部議叙三月赴鎮筸查輯邊備並撫難民上以辰州要衝命仍回駐首逆吳

半生就獲子優叙嘉慶元年湖北枝江來鳳邪匪起遣副將慶溥擊賊於龍山走之湖南境內獲安是年福康安和琳先後卒於軍晟借額勒登保德楞泰等勦撫加總督銜苗疆漸平駐辰州治善後事宜二年兼署總督三年京察予議叙布政使鄭源璿和坤以貪著需索屬吏必多金始得赴任屬吏藉胥役爲幹辦縱令嚇詐浮收苦累百姓四年和坤敗爲言官論劾詔晟平日居官猶能自守因畏和坤不敢參劾尙非通同舞弊命逮訊源璿籍其資財澈底根究具得源璿加扣平餘蓄養優伶眷屬多至三百人諸罪狀論大辟晟坐失察當革職留任上特寬之冬鎮筵苗吳陳受倡亂晟督師守隘同知傅錦以計禽斬之加太子少保五年實授總督尋調直隸六年畿輔久雨永定河決坐奏報遲延褫職逮問發河工効力工竣予主事銜刑部行走七年授刑部侍郎晟自爲曹郎以治獄明慎受知高宗數歷中外至是凡三入佐刑部仁宗尤重刑事晟識鞠務得其平多平反者江西巡撫張誠基勦義甯州匪飾稱自率兵臨陣爲屬吏所訐命晟往按得實速誠基遂暫署巡撫尋回京九年兼署戶部侍郎命赴

南河查勘清口運道疏言河身淤墊黃水增高致清水不能暢注宜啟祥符五瑞等開以減黃增運口蓋壩以蓄清如議行擢刑部尙書十一年以老疾乞休
濫詔慰留以刑部事繁特調工部章再上乃命解職在京養疴尋以前在直隸
失察藩庫虛收事降四品京堂歸卒於家

金光悌字蘭畦安徽英山人由舉人授內閣中書乾隆四十五年成進士轉宗
人府主事遷刑部員外郎歷郎中截取京察並當外任仍留部五十五年部臣
奏請以四品京堂用允之江西舉人彭良彝爲子賄買吏員執照光悌與爲姻
親御史初彭齡劾光悌瞻徇坐降調仍補刑部員外郎留部數辦秋審御史張
鵬展復劾之詔光悌在部久平日毀多譽少停其兼部尋兼內閣侍讀學士嘉
慶七年授山東按察使晉布政使十年召授刑部侍郎數奉使赴山東直隸天
津熱河勘獄並得實以報十一年授江西巡撫疏言江西積案繁多請設局清
釐十四年擢刑部尙書光悌自居郎曹爲長官所倚至是益自力以當時讞獄
多以寬厚爲福往往稍減罪狀上之部臣懸千里推鞠苟引律當毋更議故遇

事必持律不得減比人咸以光悌用法嚴然亦有從寬者舊例監守自盜限內完贓者減等乾隆二十六年改重不減等光悌奏復舊例後阿克蘇錢局章京盜官錢計贓五百兩以上主者引平人竊盜律當絞情實光悌曰盜官錢當擬斬監追不決絞情實則決矣不得引竊盜律奏平之仁宗覽奏曰官盜較私盜反薄耶對曰與其有聚斂之臣甯有盜臣律意如是卒如其議光悌練習律例議必堅執同列無以奪之然屢被彈劾時論亦不盡以爲平允十七年卒於官詔依尙書例賜卹

祖之望字舫齋福建浦城人乾隆四十三年進士選庶吉士散館授刑部主事洊升郎中俸滿當截取外任以諳悉部務留之京察一等以四五品京堂用歷通政司參議太常寺少卿仍兼部務五十八年出爲山西按察使摘律例民間易犯罪名條列之曰三尺須知錄刊布於衆俾民無誤羅法六十年遷雲南布政使上以之望親老調湖北俾便迎養嘉慶元年教匪起荆襄蔓延鄖宜施南諸郡總督巡撫皆統師出之望一人留武昌治事訛言數作時獲賊諜僞檄徧

通衢之望靜定不驚防禦要隘城鄉市鎮設保甲互稽民心帖然賊犯孝威調師剿滅下游五郡皆安堵詔以之望雖未與賊戰坐鎮根本武漢無虞嘉其功賜花翎二年丁父憂命留任素服治事四年安襄鄖道胡齊嵩侵餉事發命之望察治齊嵩侵蝕餽送輻輳猝不易究上切責之命解任來京及職定之望坐徇庇降調上知之望無染指居官有聲素諳刑名以按察使降補諭月授刑部侍郎予假葬父省母五年授湖南巡撫鎮筵黑苗出峒焚掠蔓延三廳道兵擊平之親勘常德隄圍私墾洲地百數十處造册立案永息爭端尋復召爲刑部侍郎至京面陳永綏廳孤懸苗境不見資控制請移廳治花園移協營茶洞沿邊徧設碉卡以永綏舊城爲汎地使苗弁駐劄約束諸苗寨下所司議行六年偕侍郎邢彥寶勘近畿水災又偕侍郎高杞監疏長辛店河道七年命赴山東按皂役之孫冒考巡撫和瑛誣斷事和瑛譴罷即授之望巡撫尋調陝西大軍勦南山餘孽之望籌備軍食安插鄉勇撫卹災黎借總督惠齡奏籌善後事宜甚悉調廣東乞假省親九年仍授刑部侍郎逾一年以母老乞養歸十四年仁

宗五旬萬壽之望入都祝嘏其母年八十有三上垂問褒嘉賚予有加尋丁母憂服闋擢刑部尙書十八年以病解職尋卒

韓對字桂舫江蘇元和人父是升客游京師授經諸王邸以名德稱恬少慧能文由拔貢授刑部七品小京官累擢郎中乾隆五十四年出爲河南彰德知府遷廣東高廉道坐失察吳川知縣庇縱私鹽事降刑部主事復洊遷郎中嘉慶六年授湖南岳常澧道遷按察使調福建署布政使蔡牽方擾臺灣海疆多事對籌軍備杜接濟甚力遷湖南布政使十一年召爲刑部侍郎十二年命赴荊州按將軍積拉堪與知府交結事又命勘南河十三年宗室敏學恃勢不法讞擬輕比詔斥部臣屈法縱奸譴責有差對方奉使河間讞獄未與盡諾上以對先於召對面陳意存開脫且部事素由對先覈定迹近專擅降授廣東按察使未幾擢巡撫時英吉利兵船占澳門礮台入黃埔久之始退總督吳熊光不即遣兵驅逐以罪罷命對兼署總督十四年對查閱澳門夷民安堵因疏陳西洋人於其地舊設礮台六請自伽思蘭礮台迤南加築女壙二百餘丈於前山寨

駐專營蓮花莖增關橋石垣新浦山口築礮臺填蕉門海口以資控制如議行
又密陳粵海形勢沿海村落處處可通外洋盜匪易生窺伺必先固內而後可
禦外凡屬扼要礮台宜簡練精銳嚴密防守並令沿海紳衿耆董督率丁壯互
相捍護自衛身家較爲得力百齡繼爲總督會奏華洋交易章程外國兵船停
泊外洋澳內華洋人分別稽覈各國商賈止許暫留司事之人經理債務餘俱
飭依期回國不得在澳逗留洋船引水人責令澳門同知給發牌照買辦等華
人責成地方有司慎選承充隨時稽察洋船起貨時不許洋商私自分撥下軍
機大臣採擇議行逾年海盜張保仔就撫烏石二東海嶺以次誅降賜花翎十
六年復署總督疏請免米稅以通商販裕民食又疏陳潮州多械鬪而營員無
協緝之責請令文武會拏距省遠請軍流以下就近由巡道覆覈又言懲治悍
匪請如四川例初犯械鬪限一年改行積兩限如故卽治以棍徒屢次滋擾律
皆允行十八年入覲授刑部書尙對父是升年八十給假三月歸爲壽二十一
年丁父憂服闋以一品銜署刑部侍郎尋補刑部尙書道光四年平反山西檢

次縣民閻思虎獄被議叙初思虎強姦趙二姑知縣呂錫齡受賕逼認和姦趙二姑忿而自盡親屬京控命巡撫親提仍以和姦擬結御史梁中靖疏劾提解刑部審得實情是強非和並原審各官賄屬徇縱迴護諸弊狀思虎論斬趙二姑旌表巡撫邱樹棠按察使盧元偉及府縣各官降革遣戍有差詔嘉刑部堂司各官秉公申雪並予議叙梁中靖參奏得實亦加四品銜會有官犯侯際清擬流呈請贖罪部議因際清犯罪情重仍以可否並請詔斥含混取巧命大學士托津等查訊侍郎恩欽常英司員恩德等皆有賄屬情事對亦解任就質坐失察司員得賄嗣子知情親屬撞騙議奪職遣戍因年老從寬命効力萬年地吉地工程處逾歲召署刑部侍郎六年以病乞歸十四年卒

論曰有清一代於刑部用人最慎凡總辦秋審必擇司員明慎習故事者爲之或出爲監司數年稍迴翔疆圻入掌邦憲輒終其身故多能盡職仁宗尤留意刑獄往往親裁所用部臣斯其選也姜晟祖之望敷歷中外並有政績金光悌韓對皆筦部務最久光悌治事尤厲鋒鐔號刻深云

清史稿

列傳一百四十

達椿

子 錫 世 顯

鐵保

第五保

和瑛

覺羅桂芳

達椿字香圃烏蘇氏滿洲鎮白旗人乾隆二十五年進士選庶吉士散館授戶部主事遷員外郎歷翰林院侍講侍讀國子監祭酒詹事府詹事大理寺卿二十九年入直上書房充四庫全書總閱累擢禮部侍郎兼副都統四十五年坐會同四譯館屋壞斃朝鮮使臣革職留任五十四年左遷內閣學士達椿直內廷不附和珣數媒孽其短以曠直褫職仍留上書房効力行走尋授翰林院侍講學士復迭以大考降黜授檢討仁宗知其屈抑至嘉慶四年詔達椿因曠班被譴其過輕當時劉墉亦緣此降官今劉墉已爲大學士達椿尙未遷擢加恩補授內閣學士兼副都統子薩彬圖時亦同官命達椿班次列薩彬圖之前歷禮部吏部侍郎兼翰林院掌院學士擢左都御史兼都統遷禮部尙書六年典會試七年卒薩彬圖乾隆四十五年進士授戶部主事遷員外郎典貴州鄉試

改歷翰詹累遷內閣學士兼副都統和坤既伏法仁宗不欲株連興獄而薩彬圖屢疏言和坤財產多寄頓隱匿有營管金銀使女四名請獨至慎刑司訊鞫詔嚴斥之命從王大臣訊不得實議革職予七品筆帖式効力萬年吉地尋以其父年老召還京授戶部主事累擢倉場侍郎十二年出爲漕運總督逾三歲京倉虧缺事覺降光祿寺卿遷盛京戶部侍郎十六年坐奉天災民流徙出邊視職尋卒

鐵保字冶亭棟鄂氏滿洲正黃旗人先世姓覺羅稱爲趙宋之裔後改今氏父誠秦秦鞏鎮總兵世爲將家鐵保折節讀書年二十一成乾隆三十七年進士授吏部主事襲恩騎尉世職於曹司中介然孤立意有不可爭辯勿撓大學士阿桂屢薦之遷郎中擢少詹事因事罷尋補戶部員外郎調吏部擢翰林院侍講學士仍兼吏部行走歷侍讀學士內閣學士五十四年遷禮部侍郎兼副都統校射中的賜花翎調吏部嘉慶四年奏劾司員帝責其過當左遷內閣學士轉盛京兵部刑部侍郎兼奉天府尹尋復召爲吏部侍郎出爲漕運總督五年

值車駕將幸盛京疏請御道因舊址勿闢新道裁革魄送扈從官員土儀禁從
官妄拿車馬上嘉納之七年遷廣東巡撫調山東河決衝家樓詔預籌運道九
年三月漕運迅速加太子少保尋以水淺船遲革職留任十年擢兩江總督命
覆鞠安徽壽州武舉張大有妒姦毒斃族姪獄蘇州知府周鈞受賄輕縱及初
彭齡爲安徽巡撫勘實寘法鐵保坐失察褫官銜降二品頂戴尋復之十二年
疏請八旗兵米酌給二成折色詔斥妄改舊章革職留任先後疏論治河請改
建王營減壩培築高堰山旰隄後土坡及河岸大隄修復雲梯關外海口遣大
臣勘議並採其說施行十四年運河屢壞隄荷花塘決口合而復潰錫級留任
山陽知縣王仲漢冒賑酖殺委員李毓昌至是事覺詔斥鐵保偏聽固執河工
日壞吏治日弛釀成重獄褫職遣戍烏魯木齊逾年給三等侍衛充葉爾羌辦
事大臣尋授翰林院侍講學士調喀什噶爾參贊大臣授浙江巡撫未之任改
吏部侍郎擢禮部尙書調吏部請艾吏兵兩部苛例條陳時政多見施行林清
之變召對極言內監通賊有據因窮治逆黨內監多銜恨徧騰謗言會伊犂將

軍松筠劾鐵保前在喀什噶爾治叛裔玉素普之獄誤聽人言枉殺回民毛拉素皮艾四人上怒追念江南李毓昌之獄斥其履蹈重咎褫職發往吉林効力二十三年召爲司經局洗馬道光初以疾乞休賜三品卿銜四年卒鐵保慷慨論事高宗謂其有大臣風及居外任自欲有所表見倨傲意爲愛憎屢以措施失當被黜然優於文學詞翰並美兩典禮閣及山東順天鄉試皆得人留心文獻爲八旗通志總裁多得開國以來滿洲蒙古漢軍遺集先成白山詩介五十卷復增輯改編得一百三十四卷進御仁宗製序賜名熙朝雅頌集自著曰懷清齋集弟玉保字問峯乾隆四十六年進士入翰林有才名高宗親試八旗翰詹與兄鐵保並被擢時比以郊祁軾轍官至兵部侍郎究心兵家言川楚教匪起嘗願自効行間會上欲用爲巡撫爲和珅所阻鬱鬱卒年甫四十

和瑛原名和甯避宣宗諱改字太莽額勒德特氏蒙古鑲黃旗人乾隆三十六年進士授戶部主事歷員外郎出爲安徽太平知府調潁州五十二年擢廬鳳道歷四川按察使安徽四川陝西布政使五十八年子副都統銜充西藏辦事

大臣尋授內閣學士仍留藏辦事和瑛在藏八年著西藏賦博採地形民俗物產自爲之注嘉慶五年召爲理藩院侍郎歷工部戶部出爲山東巡撫七年金鄉皂役之孫張敬禮冒考被控知縣汪廷楷置不問學政劉鳳詒以聞下和瑛提鞠誤聽濟南知府德生言誣斷爲給事中汪鏞所糾上以和瑛日事文墨廢弛政務即解職命鏞從侍郎祖之望往按得實覆和瑛職又以匿蝗災事覺譴戍烏魯木齊尋予藍翎侍衛充葉爾羌幫辦大臣調喀什噶爾參贊大臣九年授理藩院侍郎仍留邊任疏言喀什噶爾英吉沙爾倉儲足供軍食請減運伊犁布疋改徵雜糧四千石減價出糶且請嗣後折收制錢以免運費尤之劾喀喇沙爾歷任辦事大臣私以庫款貸與軍民及土爾扈特回子取息錢入已降革治罪有差十一年召還京爲吏部侍郎調倉場未幾復出爲烏魯木齊都統十三年塔爾巴哈台參贊大臣愛星阿欲調瑪納斯戍兵四百人番上屯田和瑛謂瑪納斯處極邊戍兵專事操防不諳耕作咨駁以聞上聽之十四年授陝甘總督坐前在倉場失察盜米降大理寺少卿十六年遷盛京刑部侍郎復州

甯海岫巖饑將軍觀明以罹災罷免授和瑛爲將軍廉得邊門章京塔清阿等承觀明意諱災不報降革有差尋以誤捕屯民張建謨爲盜鍛鍊成獄刑部覆訊雪其冤議革和瑛職詔寬之留任調熱河都統未上召爲禮部尙書調兵部坐失察盛京宗室裕瑞強娶有夫民婦爲妾降盛京副都統遷熱河都統二十一年授工部尙書命赴甘肅按倉庫虧缺得總督先福徇庇及貪縱狀治如律二十二年調兵部加太子少保歷禮部兵部二十三年授軍機大臣領侍衛內大臣充上書房總譜達文穎館總裁逾一歲調刑部罷內直道光元年卒贈太子太保諡簡勤和瑛嫻習掌故優於文學著書多不傳久任邊職有惠政後其子璧昌治回疆回部猶歸心焉璧昌自有傳

覺羅桂芳字香東隸鑲藍旗總督圖思德孫嘉慶四年進士選庶吉士授檢討嘗召對仁宗曰奇才也不數年累擢內閣學士十一年入直上書房遷禮部侍郎歷吏部戶部侍郎兼副都統總管內務府大臣翰林院掌院學士迭典順天江南鄉試兼直南書房桂芳家素貧有門生餽納曰執贄禮甚古某忝佐司農

俸入粗給無藉乎此封還之大學士祿康與夫聚博命偕侍郎英和按治無所
徇上嘉其不避嫌怨十八年教匪林清逆黨攔入禁城桂芳方直內廷偕諸王
大臣率兵殲捕叙勞加二級上遇變修省訓誡臣工頒御製文七篇示內廷諸
臣命各抒所見書以進御桂芳書罪已詔後曰皇上臨御以來承列聖深仁厚
澤日以愛民爲政四海之內莫不聞視今茲事變豈不怪異而臣竊以爲此未
足爲聖德之累昔孔子論仁至於濟衆論敬至於安百姓皆曰堯舜其猶病諸
豈真以堯舜之聖爲未至哉夫天下之大萬民之衆而決其無一夫之梗者蓋
自古其難之然而揆之人事則實有未盡者夫林清先以習教被繫旣釋歸轉
益煽亂數年之間往來糾結於曹衛齊魯之間其黨至數千人聞寺職官竟有
與其謀者而未事之先曾無一人抉發是吏無政也藏利刃懷白帔度越門關
飲於都市無調而知者是進者門者無禁也禁兵千計賊不及百闔門而擊之
俄頃可盡乃兩日一夜始悉禽戮是軍無律也夫吏惰卒驕文武並弛而法制
禁令爲虛器則事之可憂豈獨在賊我皇上觀微知著洞悉天下之故詔曰方

今大弊在因循怠玩至哉言乎臣敬釋之蓋因循怠玩亦有所由無才與識則有因循而已無志與氣則有怠玩而已是故得人而任之則因循怠玩之習不患不除儻非其人微獨不能除其習而已就令除之不因循而且爲煩苛不怠玩而且爲躁競其無裨於治則均耳是在皇上詢事考言循名責實器使之以奏其能專任之以收其効因小失而崇不業在陛下一旋轉聞耳書行實政論後曰實心者何忠是也忠者一於爲國而不亟亟於求上之知其所以急於公者如急於己一政而便於民其行之而恐不及也一政而不便於民其去之恐不速也不以避疑謗而易其是非之公不以處疏濳而違其夙夜之志故其於政也籌之至審而不爲旦夕之謀行之務當而不揣詔旨之合惟力是視不必其事之諒於人惟善之從不必其謀之出於己若是者謂之實政夫爲臣之道時不當忠然而忠之實蓋如此非然者初無寸勞而已爲見功之地未必加禮而已存巧避之心取容於唯諾而不以國事爲憂快意於愛憎而不以人才爲惜如斯人者雖我皇上日討而訓之尙望其能行實政乎夫政者上所以治天

下之具然而行之以實乃能有功不則文具而已官無實政民乃不治非細故也皇上震動恪恭求賢納諫勅中外諸臣改慮易志稍有人心者略敢不勉而臣所欲言者則又在陛下之心矣臣昨歲恭錄乾隆朝臣孫嘉淦三習一弊疏於御製養心殿配冊末伏願萬幾之暇時賜觀覽用其說以考諸臣之政因以識諸臣之心則賢才不患其不患奮庶績不患其不成熙較臣管蠡之見似更有助於高深焉又論致變之源由於民窮民窮由於幣輕幣輕則國與民交病論刑用重典而不得其平則不能格姦定亂論民惑邪教由士大夫好言因果利益有以導之因事納規所言多切中時弊於是復條陳時事或見之謂其未必盡合上意桂芳慨然曰此何時尙以迎合爲言耶及上嘉納之命暫在軍機處學習行走未幾授軍機大臣十九年軍事竣以贊畫功賜桂芳子炳奎七品小京官尋命往廣西按事授漕運總督未至廣西於武昌途次病疫卒上以桂芳明慎直爽方嚮用至是優詔褒卹歎爲良才難得贈太子少保加尙書銜復以曾授三阿哥讀書喪至京師命三阿哥往奠御製詩悼之設文敏著有經進

憂敬儀堂詩存才華豐贍爲時所稱

論曰承平既久八旗人士起甲科列侍從者亦多以文字被恩眷達椿杵權相
晚乃見用其守正有足稱鐵保和瑛並器識淵雅述作斐然桂芳通達政體建
言諤諤最爲一時雋才年命不永未竟其用惜哉

清史稿

列傳一百四十一

萬承風

周系英

錢樾

秦瀛

李宗瀚

韓鼎晉

朱方增

萬承風字和圃江西義甯人乾隆四十六年進士選庶吉士授檢討直上書房侍宣宗讀六十年典試雲南時仁宗在潛邸賜詩寵行累遷翰林院侍讀嘉慶三年大考降檢討四年督廣東學政瓊州海寇猝發承風以聞命總督吉慶按治總兵西密揚阿等以惟怯置吏議累遷侍講學士任滿還京直上書房擢詹事督山東學政整厲士習扶持善類游摺禮部侍郎命還京十二年督學江蘇以清江浦荷花塘河工取勢太直屢築屢圯奏請復舊詔如議行調兵部十四年上五旬萬壽陳請解任還京祝嘏詔嚴斥左遷內閣學士調安徽學政定遠士子與鳳陽胥役有隙至試期輒修怨當事者庇胥役士益憤承風疏請下巡

撫嚴治胥役實諸法擢兵部侍郎還京仍直上書房充經筵講官十七年引疾歸尋卒入祀鄉賢祠宣宗即位追念舊學贈禮部尚書銜諡文恪道光十二年晉贈太傅子方楫等加恩有差

周系英字孟才湖南湘潭人乾隆五十八年進士選庶吉士授編修累遷侍講嘉慶十年督四川學政十四年入直南書房擢太常寺卿尋改直上書房授三阿哥讀上諭不但授讀講習詩文當教阿哥爲人居心以忠厚爲本系英請加授資治通鑑以知古今治亂興衰之故悉民間疾苦上題之轉光祿寺卿督山西學政任滿回京仍直上書房十九年擢兵部右侍郎母憂去服闋補吏部侍郎二十四年湘潭民與江西客民鬪相殺傷巡撫吳邦慶亦籍江西陳奏偏袒系英詢齋奏人得事始末於召對時而陳乃調邦慶福建詔以獄事昇總督察治系英素以樸直被眷遇邦慶初與善約地方事有見聞必告至是手書言其曲直系英子汝楨亦致書在籍給事中石承藻詢獄事書並爲邦慶得先後以兩書上聞上怒系英庇鄉人部議革職猶命以編修用繼以汝楨致書事視職

回籍道光初以四品京堂召用歷翰林院侍讀學士內閣學士二年遷工部侍郎督江西學政尋調江蘇許密摺言地方利病人才臧否會浙江大水學政駐江陰系英目擊災狀貽書督撫留官吏棄得民者治賑務假庫帑三萬兩購米平糶民感之四年調戶部左侍郎卒於任

錢樾字黼棠浙江嘉善人乾隆三十七年進士選庶吉士授編修典陝西鄉試督四川學政直上書房兩典江西鄉試督廣西學政累擢少詹事嘉慶四年還京仍入直驟遷內閣學士禮部侍郎督江蘇學政時吳縣令甄輔廷治諸生糾控罪過當學政平恕曲徇所請斥革生員二十五人上聞之解平恕任以樾代至則先復諸生名僅坐首事者三人士民稱慶方其赴任途中見行船有大書內廷南府者因上疏劾奸吏詭託上累聖明詔飭關津禁絕嚴罪所司時南河邵壩決口瓜儀私梟充斥爲閭閻害命樾密訪以聞疏陳黃河自豫東界至桃宿以上水緩沙停致河高堤淺所在防潰請於霜降後鳩工疏正河並增築堤防先務所急又以私梟爲患皆由官鹽價貴民利食私若稍平鹽價則私梟自

絕疏入俱報可尋調吏部任滿回京調戶部兼管錢法堂事務奏請申禁改漕折色以清弊端復調吏部九年坐失察書吏舞弊以告病治中趙曰濂虛選運同降內閣學士榭上疏置辯議革職加恩賜編修十年擢鴻臚寺少卿督山東學政累遷大理寺少卿內閣學士母憂歸服闋引疾不出二十年卒

秦瀛字淺滄江蘇無錫人諡德松齡元孫也乾隆四十一年以舉人召試山東行在授內閣中書充軍機章京洵遷郎中五十八年出爲浙江溫處道有惠政嘉慶五年擢按察使甯紹台三府水灾有司匿不報瀛力言於巡撫乃得賑調湖南衡州歲歉有司匿不報方議派濟陝西兵米瀛復力言於巡撫留米平糶七年以病歸逾兩年起授廣東按察使督郡縣治盜禽著盜案修平吳鰲喜寅諸法撫瓊州黎匪嚴禁賭博白鴿票十年遷浙江布政使入覲乞內用授光祿寺卿轉太常寺卿疏陳廣東治盜事宜略曰海盜始在高廉近則攔入廣州大股如鄭一烏石二總兵寶朱潰等聲勢甚張內地順德香山新會三縣連有肆劫以馬觀李英芳爲之魁與海盜勾結捕急則遁入海中統將出海藉詞遷延

不能盡力黜提督孫全謀而魏大斌即爲之續臣愚以爲勦捕之法一曰討軍實水師廢弛則帑餉虛糜洋商鹽商捐輸寬裕經手之員尙有侵漁遺委之將仍復驕惰非立法痛懲徒資耗費一曰樹聲威盜善偵探非先聲擊人盜已經我兵行之日督撫宜舉觴歡飲有功而歸開轅行賞不用命者殺無赦一曰戒虛飾禽盜豈能皆真一念邀功譁多失實偶有平反不復深咎嗣後總期弋獲眞盜毋縱母枉至守禦之法尤宜急講礮臺防守口岸口岸多而汛兵少盜船乘間直入巡船復少不能禦盜且爲盜資保甲僅屬虛名縱役訛索反成厲政欲行保甲團練先須百姓服從臣以爲嚴防守必先澄清吏治澄清吏治必先固民心一曰清獄訟粵民好訟大小案件諭旨嚴飭尙多沈擱殆由案之初起遲延不辦上根訟師從而把持遂至供情屢易莫可窮究惟有督飭州縣有一案即清一案務洗滌偏私之習一曰抑尤濫六計尙廉近海州縣有緝捕解犯之責尤宜撙節庶不虧倉庫而累閭閻一令到任幕友長隨多人坐食勢不能復爲廉吏雜職武弁惟利是圖稍授以權即挾制文吏雜職差委過多亦滋擾

累一曰懲盜役胥役熟習地方情形串同官親家屬肆爲民害廣東胥役每有暗通盜匪收受陋規此尤不可不嚴行懲創也三者旣舉而吏治澄吏治澄而民心固於以舉行保甲團練無不可使之民即無不可行之法矣疏上詔下疆吏探行遷順天府尹十二年擢刑部侍郎以宗室敏學獄會擬輕縱議褫職詔原之左遷光祿寺卿歷左副都御史倉塲侍郎詔整頓倉塲慮瀛齒衰以二品頂戴調左副都御史尋授兵部侍郎復調刑部瀛治獄平愼在浙辨定海難民十二人非盜及海盜誣攀族人已入告卒更正省釋在部治運丁盜米訐者謂以藥置米中立溢試之不驗仁宗親試明其枉尤爲時稱十五年以病解任道光元年卒瀛工文章與姚鼎相推重體亦相近云

李宗瀚字春湖江西臨川人乾隆五十八年進士選庶吉士授編修嘉慶三年大考二等擢左贊善累遷侍講學士充日講起居注官五年典福建鄉試母憂歸服闋補原官轉侍讀學士九年督湖南學政歷太僕寺卿宗人府丞左副都御史二十年丁本生母憂服闋在籍奏請終生祖母養尤之道光三年遭祖母

喪先是禮臣建議爲父後者爲生祖母終三年喪宗瀚幸奉功令旣而部議仍改期服宗瀚本生父秉禮已老而有子四人以出繼不得終養五年入都召見詢家世官資甚悉宗瀚具陳終養始末宣宗爲之嗟歎遂補原官八年擢工部侍郎典浙江鄉試留學政十一年丁本生父憂哀毀扶病奔喪卒於衢州以衰服殮年六十三宗瀚孝謹恬退中歲以養親居林下十年書法尤爲世重

韓鼎晉字樹屏四川長壽人乾隆六十年進士選庶吉士授檢討嘉慶九年改御史疏言天主教流傳之害請申禁以絕根株從之以母老請終養十六年服闋補原官疏陳四川積弊六事曰禁科派以安閭閻除囑匪以防積漸查下房以全民命禁拐騙以警貪頑嚴攤捐以養廉潔覈戎政以歸實效又言京師賭風大熾多屬王公大臣輿夫設局倚勢飲法帝命指實下詔嚴治踰日獲賭案三大學士步軍統領祿康輿夫爲之魁親貴近臣莫不悚息巡視山東漕務轉工科給事中光祿寺少卿督陝甘學政疏言檢綬諸州縣倉貯空虛宜設法籌補其地資蒙古糧食接濟今腹裏邊外俱荒當分別安置撫恤又言南山善後

事宜宜行堅壁清野之法山內流民雜處最爲姦藪當嚴行保甲使奸宄無所匿軍中擗脅難民子女請嚴禁南山附近及豫東並經兵燹宜慎選牧令以蘇民氣川北荒歉與陝甘毘連鹽梟輜匪多出其中請先事豫防並下疆吏如所請行歷鴻臚寺卿通政司副使太常寺卿左副都御史二十四年命察視近畿水灾督黃村賑務督福建學政疏言閩中吏治久窳請不限資格用廉幹吏補汀漳泉三郡望緊要缺久其任以專責成漳泉營伍通盜請責提鎮立予重典勿稍袒庇道光六年遷倉場侍郎以病罷起補工部侍郎京察原品休致卒於

家祀鄉賢祠

朱方增字虹舫浙江海鹽人嘉慶六年進士選庶吉士授編修典雲南鄉試選國子監司業十八年教匪之變方增劾直隸總督溫承惠貽誤地方黜之應詔陳言論用人理財略曰近今大臣中罕有以進賢爲務者蓋薦舉之事易於循私黨援交結不得不防而大臣亦遂引嫌自避夫大臣避徇私之名而忘以人事君之責所謂因噎廢食非公忠體國者所宜有也至於任用之方則無過於

考言詢事皇上博訪周諮徐爲印證於召對時各就所長諭使面陳果能洞悉原委又嘗試之以事以觀其能踐與否如或敷奏並無條理則其人固不足用而大臣之識見優細心地公私亦可見矣抑臣思臣工居職苟非開茸齷齪者流孰不思自效况蒙皇上訓飭至再至三而猶故習相仍驟難振拔者良有數端條例過繁文案瑣屑雖有強敏之吏而精神疲於具文其實關於政治民生轉致不能詳覈一也差務絡繹公私賠累身家之恤不遑民物之懷漸忍二也訐告之風至今益甚嘗有以田土門殿細故而叩關京控者有司畏其挾制不得不姑息委蛇雖有急公自好者其尋常瑣屑之事豈皆一一可達聖聰甚至匿名揭帖無主名之可指蠹吏猾胥奸民惡僕求謀不遂懲治過嚴皆可造作飛語訐及陰私足使任事之心不寒而栗委曲隱忍奸宄橫行大都由此三也今皇上欲整飭因循積習臣愚以爲必先除此三者之弊庶廓然無所疑畏而得專精實政矣經國之方理財尤要古者以三十年之通制國用斟酌盈虛量入爲出用能經常不匱今戶部歲入歲出年一彙奏惟中外未合爲一條緒繁

附極難釐剔且凡撥解即謂之出並未實計所用新舊牽湊淺雜益甚而出納諸款又因有無定之款盈蝕參差以故一歲之中所出幾何數之所入贏餘若干不能得其實數請旨敕下戶部歲入歲出宜合中外爲一核計贏餘總數仍取前一二歲所贏餘確實比較然後審其輕重緩急舉一切例內例外諸用款有可裁省停緩者酌加撙節庶合於古人通年制用之法而度支充裕矣二十一年入直懋勤殿編纂石渠寶笈秘殿珠林尋督廣西學政累遷翰林院侍讀學士道光四年大考第一擢內閣學士典山東鄉試七年督江蘇學政十年卒方增熟諳朝章典故輯國史名臣事蹟爲從政觀法錄行於世

論曰萬承風周系英錢樾以侍從之臣輟車所至建白卓然秦瀛之治績李宗瀚之孝行非僅以文藻稱韓鼎晉朱方增侃侃獻納言有體要皆風采著於朝列矣

清史稿

列傳一百四十二

魁倫

廣興

初彭齡

魁倫完顏氏滿洲正黃旗人副將軍查弼納孫也襲世管佐領兼輕車都尉授四川漳臘營參將累擢建昌鎮總兵管入覲高宗詢家世魁倫陳戰功甚悉乾隆五十三年擢福州將軍喜聲伎制行不謹總督伍拉納欲劾之伍拉納故貪逼勒屬吏賄復縱洋盜盜艇集五虎門外不問魁倫遂疊疏劾閩省吏治廢弛伍拉納及巡撫浦霖溺職按察使錢受椿等迎合助虐上怒褫伍拉納等職逮問命長麟署總督借魁倫鞫訊得伍拉納等貪婪及庫藏虧絀狀俱伏法伍拉納爲和珅姻戚富按治時上切責長麟瞻徇罷去以事由魁倫舉發特寬之代署總督嚴捕海盜屢獲其魁嘉慶元年實授總督三年巨盜林發枝投首海患稍戢以母憂歸自治閩獄以伉直聞於時仁宗尤眷之四年起署吏部尙書魁倫屢於上前自稱昔治四川囑匪功謂賊不難辦請赴軍前時上督責諸將

平賊甚急經略勒保未稱帝意命魁倫赴四川速勒保治罪即代署總督駐達州治軍傾勒保獲譴由蜚語既就逮所部訴其冤乞代奏魁倫稍稍爲置辯終以玩誤軍務讞擬重辟軍心因之渙散不爲用額勒登保繼爲經略與德楞泰先後赴甘肅勦竄匪魁倫專任四川軍事五年春冉天元糾數路殘匪潛匿大竹魁倫逡巡未發賊脅衆數萬由定遠渡嘉陵江圍擾川西魁倫繞道鄰水自順慶追勦檄總兵七十五還守重慶上以數年來賊氛皆在川東北惟川西完善地爲軍饑所出斥魁倫疏防革職留任賊尋渡江掠蓬溪諸將獨總兵朱射斗力戰而兵少魁倫約爲接應復不至射斗戰死魁倫退屯潼川降三品頂戴詔賚嚴守潼河曰此爾生死關頭也復起勒保爲四川提督偕德楞泰進勦川西川北四月賊伺川西備嚴乘間竄渡潼河焚太和逼成都上怒魁倫屢失機縱賊褻職逮問命勒保代署總督侍郎周興岱往會鞠尋逮京賜死子扎拉芬戍伊犁魁倫居官廉自爲尙書時詔寬減閩關賠繳銀六千兩至是醫家產不足償上益憐之給還宅一區俾其妻有所棲止又因其孫幼稚命扎拉芬到成

三年釋歸宣諭廷臣使知法戒焉

廣興字廣虞滿州鑲黃旗人大學士高晉第十二子入資爲主事補官禮部敏於任事背誦案牘如瀉水大學士王杰器其才累遷給事中嘉慶四年首劾和珅罪狀擢副都御史命赴四川治軍需綜覈精嚴月節糜費數十萬金爲時所忌以誣擾驛傳被劾上優容之復屢與總督魁倫互劾召還左遷通政副使九年擢兵部侍郎兼副都統總管內務府大臣署刑部侍郎同寮輕其於刑名非素習廣興引證律例屢正誤讞衆乃服十一年奏劾御前大臣定親王蘇恩揀選官缺專擅違例廷臣察詢不直所言降三品京堂罷兼職尋補奉宸苑卿擢刑部侍郎復兼內務府大臣上方倚任廣興亦慷慨直言召對每逾晷刻上曰汝與初彭齡皆朕信任之人何外廷怨恨乃爾廣興頽首謝數奉使赴山東河南按事益作威福中外側目內監鄂羅哩者自乾隆中充近侍年七十餘嘗至朝廊與廣興坐語以長者自居廣興粲然曰汝輩閹人當敬謹侍立安得與大臣論世詎乎鄂羅哩恨次骨思以中之十三年冬內庫給宮中絀段不如數且

竊收鄂羅哩言由廣興尅減上即命傳諭出而漫言之廣興不知爲上旨坐而與辯鄂羅哩入奏其坐聽諭旨上怒一日面詰廣興廣興言總管太監孫進忠與庫官勾通欲交外省織造藉遂需索規費之計上以其不能指實庫官何人挾詐而欺下廷臣譴罪尋寬之罷職家居於是與廣興不協者讎起媒孽其短上密諭山東河南兩省巡撫察奏遂交章劾其奉使時任意作威苛求供頓收納餽遺諸罪狀下獄議絞上親廷訊尙欲緩其獄廣興未省上意抗辯無引罪語而賊私有實據上益怒遂置之法籍其家子蘊秀成吉林並罪兩省官吏及山東言官各有差廣興仇爽無城府疾惡嚴喜誣人陰私既得志驕奢日甚縱情聲色不能約束奴僕終及於禍

初彭齡字頤園山東萊陽人乾隆三十六年巡幸山東召試賜舉人四十五年成進士選庶吉士授編修五十四年遷江南道御史劾協辦大學士彭元瑞徇私爲媾姪營事元瑞被黜又江西巡撫陳准以貪著劾罷之風采振一時累遷兵部侍郎嘉慶四年出爲雲南巡撫時總督富綱請罷官鹽改歸民運民銷詔

下彭齡議疏上略曰：海鹽向例官督鹽煎，分井定額，按月完納，省倉行銷之法。按州縣戶口多寡，定額地方官備價運銷，交課其始。竈戶所領官給薪本數裕，交足額鹽之外，尚有餘鹽官售額鹽，扣還腳價之外，尚有餘課行之日久，不肖州縣勾通井官私買額外餘鹽，行銷肥己。竈戶利於賣私，益滋偷漏。前巡撫劉秉恬遂令州縣額銷十萬斤者加銷一二萬，以資辦公。竈戶薪本不敷，無力加煎。糶和灰土州縣滯銷，因有派累之事。乾隆五十六年，鹽道蔣繼勳以官銀盡買安甯等井私煎之鹽，并發州縣銷售，欲以彌縫虧空。額鹽積壓愈多，於是州縣又有計口授鹽，短秤加課之弊。煙戶無論男女老幼，皆應交課。窮困已極，迤西一帶遂至聚眾抗官，斃差焚屋。前年威遠猥夷滋擾，即有此等姦民。祿豐一案亦由鹽務起釁。江蘭並匿情不奏，富綱到滇實見，有不得不改章以甦民困者。竊思海鹽官運官銷，積弊難返。應如督臣所奏，改爲就井收課，聽民自便。於是損益原奏，令竈戶自煎自賣，商販領照聽其所之。試行二三年，再定各井歲額。下部議行，又籌置堡田，免徭役，加派滇民，咸之効。前撫江蘭匿抱母恩，耕二

井水火不奏蘭因黜罷六年自陳親老乞改京職允之以貴州巡撫伊桑阿代途次劾伊桑阿驕奢乖戾苛派屬員勦石覲苗飾詞冒功遣使勘實實伊桑阿於法回京授刑部侍郎七年偕副都統富尼善往貴州按事劾巡撫常明鉛廠之弊褫職治罪即代署巡撫尋調署雲南巡撫劾布政使陳孝昇迤西道薩榮安以維西軍務冒帑治如律八年偕侍郎額勒布清查陝西軍需自巡撫秦承恩以下黜罰有差調工部侍郎又調戶部九年誤聽湖北巡撫高杞言劾湖廣總督吳熊光受賄不得實後復以獨對時密諭私告杞事覺下廷臣議罪以大辟上仁宗知彭齡無他不欲因言事加重譴詔斥諸臣所擬過當有意杜言事者之口又念彭齡親老免遠謫罷職家居逾年起授右庶子驟遷內閣學士十一年偕侍郎英和往陝西讞獄途經山西命察議河東鹽務尋授安徽巡撫壽州武舉張大有因妒姦毒斃族姪張倫及雇工人總督鐵保徇蘇州知府周鶴以自中蛇毒定讞彭齡推鞫得實詔嘉之特予議叙鐵保等降黜有差父憂歸十四年奪情授貴州巡撫固辭不起服闋署山西巡撫遂實授劾前巡撫成齡

需索供應又劾布政使劉清署按察使張曾獻及府州縣多人尋調陝西河東道劉大觀揭劾初彭齡任性乖張命回山西聽勘以怒斥前撫金應琦及贖徇知府朱錫庚部議革職詔寬之降補鴻臚寺卿遷順天府尹十六年借尚書托津清查南河工帑劾罷廳營四十八員復借尚書崇祿往福建讞獄遷工部侍郎署浙江巡撫尋命往兩湖按訊湖北按察使周季堂及湖南學政徐松季堂無貪跡惟袒庇屬員褫職免治罪松需索陋規出題割裂聖經褫職遣戍十七年調戶部侍郎時兩江總督百齡劾南河總督陳鳳翔誤啟智禮兩壩鳳翔已被譴自訴辯又訐百齡信任鹽巡道朱爾宸額督辦葦蕩失當命彭齡松筠往按百齡於收壩時實同畫諾遂請薄懲百齡而朱爾宸額被重譴語詳百齡等傳署南河總督尋調倉場侍郎十九年命往廣西按訊巡撫成林以恣意聲色用度多靡褫成林職籍其家擢兵部尚書特命署江蘇巡撫清查虧空疏言虧空應立時懲辦而各省督撫往往密奏僅使分限完繳始則屬官玩法任意侵欺繼則上司市恩設法掩蓋是以清查爲續虧出路密奏爲緩辦良圖請飭禁

帝聽之劾江甯布政使陳桂生江蘇布政使常格催徵不力並褫職尋巡撫張師誠回任仍命彭齡會同清查彭齡與百齡師誠意不合各擬章程上詔斥其不能和衷既而疏劾百齡師誠受關道鹽員饋銀又劾陳桂生弊混命大學士托津尙書景安往按至則百齡師誠嗾屬員多方沮格所劾並不得實上以彭齡性褊急嫉惡過嚴斥其輕躁降內閣學士召回京茅豫者以部員隨赴廣西因留江蘇佐理改知府至是彭齡疏陳豫兩耳重聽代爲乞假詔斥越職專擅再降以翰林院侍讀侍講候補百齡復劾彭齡沈湎於酒事一委茅豫文致陳桂生之罪私拆批摺挾怨譴參且豫實非耳聾亦徇欺上怒褫彭齡職停其母九旬恩資令閉門思過二十一年起爲工部主事丁母憂未歸請改注籍順天服闋以員外郎用道光元年授禮部侍郎尋擢兵部尙書三年萬壽節與十五老臣宴繪圖於萬壽山玉瀾堂御製詩稱其耿介優資珍物四年以年老休致食半俸五年卒詔優卹

論曰甚矣直臣之不易爲也赤心爲國犯顏批鱗而人主諒之苟有排異已市

盛名之心借徑梯榮衆矢集焉况身罹負乘或加之貪婪乎魁倫廣興之所以不得其死也初彭齡雖亦褊躁然實政清操蹶而復起克保令名宜哉

清史稿

列傳一百四十三

洪亮吉

谷際岐

李仲昭

石承藻

洪亮吉字稚存江蘇陽湖人少孤貧力學孝事寡母初佐安徽學政朱筠校文繼入陝西巡撫畢沅幕爲校刊古書詞章考據著於一時尤精學輿地乾隆五十五年成一甲第二名進士授翰林院編修年已四十有五長身火色性豪邁喜論當世事未散館分校順天鄉試督貴州學政以古學教士地僻無書籍購經史通典文選置各府書院貽士始治經史爲詩古文有法任滿還京入直上書房授皇曾孫奕純讀嘉慶三年大考翰詹試征邪教疏亮吉力陳內外弊政數千言爲時所忌以弟喪陳情歸四年高宗崩仁宗始親政大學士朱珪書起之供職與修高宗實錄第一次稿本成意有不樂將告歸上書軍機王大臣言事略曰今天子求治之心急矣天下望治之心孔迫矣而機局未轉者推原其故蓋有數端亮吉以爲勦精圖治當一法祖宗初政之勤而尙未盡法也用人

行政當一改權臣當國之時而尙未盡改也風俗則日趨卑下賞罰則仍不賤明言路則似通而未通吏治則欲肅而未肅何以言勵精圖治尙未盡法也自三四月以來視朝稍晏竊恐退朝之後俳優近習之人榮感聖聽者不少此親臣大臣啟沃君心者之過也蓋犯顏極諫雖非親臣大臣之事然不可使國家無嚴憚之人乾隆初年純皇帝宵旰不遑勤求至治其時如鄂文端朱文端張文和孫文定等皆侃侃以老成師傅自居亮吉恭修實錄見一日中硃筆細書折成方寸或詢張鄂或詢孫朱曰某人賢否某事當否日或十餘次諸臣亦皆隨時隨事奏片質語直陳是上下無隱情純皇帝固聖不可及而亦衆正盈朝前後左右皆嚴憚之人故也今一則處事太緩自乾隆五十五年以後權私蒙蔽事事不得其平者不知凡幾矣千百中無有一二能上達者即能上達未必即能見之施行也如江南洋盜一案參將楊天相有功駢戮洋盜某漏網安居皆由署總督蘇凌阿昏愎糊塗貪贓玩法舉世知其冤而洋盜公然上岸無所顧忌皆此一事釀成况蘇凌阿權相私人朝廷必無所顧惜而至今尙擁巨賈

厚自頤養江南查辦此案始則有心爲承審官開釋繼則並聞以不寃覆奏夫以聖天子赫然獨斷欲平反一事而尙如此則此外沈寃何自而雪乎一則集思廣益之法未備堯舜之主亦必詢四岳詢羣牧蓋恐一人之聰明有限必博收衆采庶無失事請自今凡召見大小臣工必詢問人材詢問利弊所言可采則存檔册以記之倘所舉非人所言失實則治其失言之罪然寄耳目於左右近習不可也詢人之功過於其黨類亦不可也蓋人材至今日銷磨殆盡矣以模稜爲曉事以軟弱爲良罔以鑽營爲取進之階以苟且爲服官之計由此道者無不各得其所欲而去衣鉢相承牢結而不可解夫此模稜軟弱鑽營苟且之人國家無事以之備班列可也適有緩急而欲望其奮身爲國不顧利害不計夷險不瞻徇情而不顧惜身家不可得也至於利弊之不講又非一日在內部院諸臣事本不多而常若猝猝不暇汲汲顧影皆云多一事不如少一事在外督撫諸臣其賢者斤斤自守不肖者亟亟營私國計民生非所計也救目前而已官方吏治非所急也保本任而已慮久遠者以爲過憂事興革者以爲生

事此又豈國家求治之本意乎二則進賢退不肯似尙游移夫邪教之起由於激變原任達州知州戴如焯罪不容道矣幸有一衆口交譽之劉清百姓服之教匪亦服之此時正當用明效大驗之人聞劉清尙爲州牧僅從司道之後辦事似不足盡其長矣某以爲川省多事經略縱極嚴明勦賊匪用之撫難民用之整飭官方辦理地方之事又用之此不能分身者又何如擇此方賢吏如劉清者崇其官爵假以事權使之一意招徠撫綏以分督撫之權以戢國家之事有明中葉以來鄖陽多事則別設鄖陽巡撫偏沅多事則別設偏沅巡撫事竣則撤之此不可拘拘於成例者也夫設官以待賢能人果賢能似不必過循資格如劉清者進而尙未進也戴如焯雖以別案解任然尙安處川中聞教匪甘心欲食其肉知其所在即極力焚劫是以數月必移一處教匪亦必隨而迹之近在川東與一道員聯姻恃以無恐是救一有罪之人反殺千百無罪之人其理尙可恕乎純皇帝大事之時即明發諭旨數和珅之罪並一一指其私人天下快心乃未幾而又起吳省蘭矣召見之時又聞其爲吳省欽辨冤矣夫二吳

之爲和珅私人與之交通貨賄人人所知故曹錫寶之糾和珅家人劉全也以同鄉素好先以摺臺示二吳二吳即袖其囊走權門藉爲進身之地今二吳可雪不幾與褻贈曹錫寶之明旨相反乎夫吳省欽之傾險秉文衡尹京兆無不聲名狼藉則革職不足蔽辜矣吳省闈先爲和珅教習師後反稱和珅爲老師大考則第一矣視學典試不絕矣非和珅之力而誰力乎則降官亦不足蔽辜矣是退而尙未退也何以言用人行政未盡改也蓋其人雖已致法而十餘年來其更變祖宗成例汲引一己私人猶未嘗平心討論內閣六部各衙門何爲國家之成法何爲和珅所更張誰爲國家自用之人誰爲和珅所引進以及隨同受賄舞弊之人皇上縱極仁慈縱欲寬脅從又因人數甚廣不能一切屏除然竊以爲實有眞知灼見者自不究其從前亦當籍其姓名於升遷調補之時微示以善惡勸懲之法使人人知聖天子雖不爲己甚而是非邪正之辨未嘗不洞悉未嘗不區別如是而夙昔之爲私人者尙可革面革心而爲國家之人否則朝廷常若今日清明可也萬一他日復有效權臣所爲者而諸臣又羣起

而集其門矣何以言風俗日趨卑下也士大夫漸不顧廉恥百姓則不顧綱常然此不當責之百姓仍當責之士大夫也以亮吉所見十餘年來有尙書侍郎甘爲宰相屈膝者矣有大學士七卿之長且年長以倍而求拜門生求爲私人者矣有交宰相之僮隸並與樂抗禮者矣太學三館風氣之所由出也今則有昏夜乞憐以求署祭酒者矣有人前長跪以求講官者矣翰林大考國家所據以陞黜詞臣者也今則有先走軍機章京之門求認師生以探取御製詩韻者矣行賄於門闈侍衛以求傳遞代倩藏卷而去製就而入者矣及人人各得所欲則居然自以爲得計夫大考如此何以責鄉會試之懷挾替代士大夫之行如此何以責小民之誇詐資緣輩轂之下如此何以責四海九州之營私舞弊純皇帝因內閣學士許玉猷爲同姓石工護喪論廷臣曰諸臣縱不自愛如國體何是知國體之尊在諸臣各知廉恥夫下之化上猶影響也士氣必待在上者振作之風節必待在上者獎成之舉一廉樸之吏則貪欺者庶可自愧矣進一恬退之流則奔競者庶可稍改矣拔一特立獨行敦品勵節之士則如脂如

韋依附朋比之風或可漸革矣而亮吉更有所慮者前之所言皆士大夫之不務名節者耳幸有矯矯自好者類皆惑於因果遁入虛無以蔬食爲家規以談禪爲國政一二人倡於前千百人和於後甚有出則官服入則僧衣惑智驚愚駭人觀聽亮吉前在內廷執事曾告之曰某等親王十人施齋戒殺者已十居六七羊豕鵝鴨皆不入門及此回入都而士大夫持齋戒殺又十居六七矣深恐西晉祖尙元虛之習復見於今則所關世道人心非小也何以言賞罰仍不嚴明也自征苗匪教匪以來福康安和琳孫士毅則蒙蔽欺妄於前宜繇惠齡福甯則喪師失律於後又益以景安秦承恩之因循畏葸而川陝楚豫之民遭劫者不知幾百萬矣已死諸臣姑置勿論其現在者未嘗不議罪也然重者不過新疆換班輕者不過大營轉饒甚至拏解來京之秦承恩則又給還家產有意復用矣屢奉嚴旨之惠齡則又起補侍郎夫蒙蔽欺妄之殺人與喪師失律以及因循畏葸之殺人無異也而猶邀寬典異數亦從前所未有也故近日經略以下領隊以上類皆不以賊匪之多寡地方之蹂躪挂懷彼其心未始不自

計曰即使萬不可解而新臨換班大營轉饒亦尙有成例可援退步可守國法之寬及諸臣之不畏國法未有如今日之甚者純皇帝用之兵金川緬甸訥親債事則殺訥親額爾登額債事則殺額爾登額將軍提鎮之類伏失律之誅者不知凡幾是以萬里之外得一廷寄皆震懼失色則馭軍之道得也今自己卯以迄己未首尾五年債事者屢矣提鎮副都統偏裨之將有一膺失律之誅者乎而欲諸臣之不玩寇不殃民得乎夫以純皇帝之聖武又豈見不及此蓋以歸政在即欲留待皇上蒞政之初神武獨斷一新天下之耳目耳倘濫平尙無期日而國帑日見銷磨萬一支絀偶形司農告匱言念及此可爲寒心此尤宜急加之意者也何以言言路似通而未通也九卿臺諫之臣類皆毛舉細故不切政要否則發人之陰私快己之恩怨十件之中幸有一二可行者發部議矣而部臣與建言諸臣又各存意見無不議駁並無不通駁則又豈國家詢及芻蕘詢及瞽史之初意乎然或因其所言瑣碎或輕重失倫或虛實不審而一概留中則又不可其法莫如隨閱隨發面諭廷臣或特頒諭旨皆隨其事之可行

不可行明白曉示之即或彈劾不避權貴在諸臣一心爲國本不必避嫌怨以
近事論錢澧初彭齡皆常彈及大僚矣未聞大僚敢與之爲仇也若其不知國
體不識政要冒昧立言或攻發人之陰私則亦不妨使衆共知之以著其非而
懲其後蓋諸臣既敢挾私而不爲國更可無煩君上之迴護矣何以言吏治欲
肅而未肅也夫欲吏治之肅則督撫藩臬其標準矣十餘年來督撫藩臬之貪
欺害政比比皆是幸而皇上親政以來李奉翰已自斃鄭元璫已被糾富綱已
遭憂江蘭已內改此外官大省據方面者如故也出巡則有站規有門包常時
則有節禮生日禮按年則又有幫費升遷調補之私相餽謝者尙未在此數也
以上諸項無不取之於州縣州縣則無不取之於民錢糧漕米前數年尙不過
加倍近則加倍不止督撫藩臬以及所屬之道府無不明知故縱否則門包站
規節禮生日禮幫費無所出也州縣明言於人曰我之所以加倍加數倍者實
層層衙門用度日甚一日年甚一年究之州縣亦恃督撫藩臬道府之威勢以
取於民上司得其半州縣之入己者亦半初行尙有畏忌至一年二年則成爲

舊例牢不可破矣訴之督撫藩臬道府皆不問也千萬人中或有不甘冤抑赴京控告者不過發督撫審究而已派欽差就訊而已試思百姓告官之案千百中有一二得直者乎即欽差上司稍有良心者不過設爲調停之法使兩無所大損而已若欽差一出則又必派及通省派及百姓必使之滿載而歸而心始安而可以無後患是以州縣亦熟知百姓之技倆不過如此百姓亦習知上控必不能自直是以往往至於激變湖北之當陽四川之達州其明效大驗也亮吉以爲今日皇上當法憲皇帝之嚴明使吏治肅而民樂生然後法仁皇帝之寬仁以轉移風俗則文武一張一弛之道也書達成親王以上聞上怒其語戇落職下廷臣會鞫面諭勿加刑亮吉感泣引罪擬大辟免死遣戍伊犁明年京師早上禱雨未應命清獄囚釋久戍未及期詔曰罪亮吉後言事者日少即有亦論官吏常事於君德民隱休戚相關之實絕無言者豈非因亮吉獲罪鉗口不復敢言朕不聞過下情復壅爲害甚鉅亮吉所論實足啟沃朕心故銘諸座右時常觀覽勤政遠佞警省朕躬今特宣示亮吉原書使內外諸臣知朕非拒

諫飾非之主實爲可與言之君諸臣遇可與言之君而不與言負朕求治苦心
即傳諭伊犁將軍釋亮吉回籍詔下而兩御製詩紀事注謂本日親書諭旨夜
子時甘霖大沛天鑿捷於呼吸益可感畏亮吉至成甫百日而赦還自號更生
居士後十年卒於家所著書多行世管世銘字緘若與亮吉同里乾隆四十三
年進士授戶部主事累遷郎中充軍機章京深通律令凡讞牘多世銘主奏屢
從大臣赴浙江湖北吉林山東按事大學士阿桂尤善之倚如左右手時和珅
用事世銘憂憤與同官論前代輔臣賢否語譏切無所避會遷御史則大寤夜
起傍徨草疏將劾之詔仍留軍機處故事御史留直者儀注仍視郎官不得專
達封事世銘自言愧負此官阿桂慰之曰報稱有日何必急以言自見蓋留直
阿桂所請隱全之使有待嘉慶三年卒

谷際岐字西阿雲南趙州人乾隆四十年進士選庶吉士授編修與校四庫全
書充會試同考官所拔多知名士乞養歸主講五華書院教士有法連丁父母
憂服闋起原官嘉慶三年遷御史時教匪擾數省師久無功際岐徧訪人士來

京者具得其狀四年春上疏略曰竊見三年以來先帝頒師征討邪教川陝責之總督宜繇巡撫惠齡秦承恩楚北賁之總督畢沅巡撫汪新諸臣釀釁於先藏身於後止以重兵自衛裨并奮勇者無調度接應由是兵無鬪志川楚傳言云賊來不見官兵而賊去官兵才出現又云賊去兵無影兵來賊沒蹤可憐兵與賊何日得相逢前年總督勒保至川大張告示痛責前任之失是其明證畢沅汪新相繼殞逝景安繼爲總督今宜繇惠齡秦承恩縱慢於左景安怯玩於右勒保縱能實力勦捕陝楚賊多起滅無時則勒保終將掣肘欽惟先帝昔征緬甸見楊應琚挑撥掩覆之罪立予拿問今宜繇等曠玩三年之久幸荷寬典而轉益懷安任賊越入河南盧氏魯山等縣景安雖無吞饜聲名而罔味自甘近亦有賊焚掠襄光各境均爲法所不容况今軍營副封私札商同軍機大臣改壓軍報供據已破雖由內臣聲勢而彼等掩覆偵事情更顯然請旨懲究另選能臣與勒保會同各清本境則軍令風行賊必授首比年發饟至數千萬軍中子女玉帛奇寶錯陳而兵食反致有虧載賊而歸風盈道路嘲之者有與其

請饒不如書會票之語先帝嚴究軍需局察出四川漢州知州與德楞泰互爭報銷及湖北道員胡齊崙侵饒數十萬一則追賠一則拿究他屬類此者必多尤宜急易新手清盤則侵盜之跡必能破露不但兵饑與善後事宜均得充裕銷算亦不敢牽混矣間又上疏曰教匪滋擾始於湖北宜都蕪傑人實自武昌府同知常丹葵苛虐逼迫而起當教匪齊麟等正法於襄陽匪徒各皆歛輯常丹葵素以虐民喜事爲能乾隆六十年委查宜都縣境嚇詐富家無算赤貧者按名取結納錢釋放少得供據立與慘刑至以鐵釘釘人壁上或鐵錘排擊多人情介疑似則解省城每船載一二百人飢寒就斃浮屍於江歿獄中者亦無棺歛而傑人號首富屢索不厭村黨結連拒捕宜昌鎮總兵突入遇害由是宜都枝江兩縣同變襄陽之齊王氏姚之富長陽之覃加耀張正謨等聞風並起遂延及河南陝西此臣所聞官逼民反之最先最甚者也臣思教匪之在今日自應盡燹梟磔而其始猶是百數十年安居樂業人民何求何憾甘心棄身家捐性命挺而走險耶臣聞賊當流竄時猶哭念皇帝天恩殊一無言怨及朝廷

向使地方官仰體皇仁察教於平日撫弭於臨時何至如此臣爲此奏固爲官吏指事聲罪亦欲使萬禩子孫知我朝無叛民而後見恩德入人天道人心協應長久昭昭不爽也常丹葵邊虐一時上廕聖仁下殃良善罪豈容誅應請飭經略勒保嚴察奏辦又現奉恩旨凡受撫來歸者令勒保傳喚同知劉清同川省素有清名之州縣妥議安插楚地曾經滋擾者亦應安集臣聞被擾州縣逃故各戶之田廬婦女多歸官吏壓賣分肥是始不顧其反終不願其歸不知民何負於官而效尤覩忍至於此極若得懲一儆衆自可羣知洗濯宣奉德意所關於國家苞桑之計匪細也兩疏上仁宗並嘉納施行尋遷給事中稽察南新倉巡視中城雲南鹽法官運官銷日久因緣爲奸按口比銷民不堪命又威遠調取民夫按名折銀折後又徵實夫迤西道屬數十州縣同時閔變解散後不以實聞官吏勸法如故際岐上疏痛陳其害下雲南督撫察治總督富綱請改鹽法以便民巡撫江蘭方內召欲沮其事際岐復疏爭初彭齡繼爲巡撫際岐門下士也熟聞其事始疏請鹽由籠煎籠賣民運民銷一祛積弊民大便語詳

鹽法志蔡永清者總督陳輝祖家奴擁厚貲居京師以助賑叙五品職銜出入與馬揖讓公卿間際岐疏劾自大學士慶桂朱珪以下多所指斥下刑部鞠訊視永清職銜際岐坐論奏未盡實降授刑部主事累遷郎中以老乞休貧不能歸主講揚州孝廉堂垂十年卒自乾隆末雲南之官於朝以直言著者尹壯圖錢謙時以際岐並稱焉

李仲昭字次卿廣東嘉應人嘉慶七年進士選庶吉士授編修遷御史長蘆鹽商僞造加重法馬每引浮百斤損課滯銷商人查有圻家鉅富交通朝貴自給事中花杰劾蘆鹽加價連及大學士戴衢亨不得直且被譴遂無敢言者仲昭疏劾之戶部猶袒商或騰蜚語謂仲昭索賄不遂仁宗方幸熱河命留京王大臣同鞠得舞弊狀有圻論如律在事降革有差人咸側目仲昭又劾吏部京察不公亦鞠實既而赴戶部點卯杖責書吏戶部摭其事奏劾下吏部議羣欲以傾仲昭侍郎初彭齡號剛正以妻喪在告語人曰諸人欲報怨加以莫須有之罪李御史有言臆臺中何可無此人部員聞彭齡言遽議降四級甫兩日而奏

上仲昭竟黜

石承藻字黼庭湖南潭州人嘉慶十三年一甲三名進士授編修遷御史給事中敢言有聲王樹勳者江都人乾隆末入京應試不售乃於廣惠寺爲僧名曰明心開堂說法假扶乩卜筮探刺士大夫陰私揚言於外人益崇信達官顯宦每有飯依受戒爲弟子者朱珪正人負重望亦與交接時和珅爲步軍統領訪捕治罪以賄得末減勒令還俗遂游蕩江湖值川楚匪亂投効松筠軍中以談禪投所好使易裝入賊寨說降獎予七品官銜游擢襄陽知府數年入覲京師不改故態刑部尙書金光悌延醫子病怵以禍福光悌長跪請命爲時所嗤嘉慶二十年承藻疏請澄清清流品劾樹勳下刑部鞫實褫職枷號兩月發黑龍江充當苦差仁宗獎承藻曰眞御史也詔斥被惑諸臣有玷官箴其已故者免議侍郎蔣予蒲宋銘以下黜降有差二十四年湘潭有土客械鬪之獄侍郎周系英與巡撫吳邦慶互劾承藻適在籍系英子汝楨致書承藻詢其事爲邦慶所發承藻牽連降秩久之不復遷終光祿寺署正

論曰仁宗詔求直言下至末吏平民皆得封章上達言路大開科道中竭誠獻納如衛謀論福康安貪婪不宜配享太廟馬履泰論景安畏縮偷安老師糜餼及教匪宜除難民宜撫又論百齡舉劾失當張鵬展論金光悌專擅刑部戀司職不去周栻論疆臣參劾屬員不舉劣迹恐悞無華者以失歡被劾又論朱珪以肩輿擅入禁門無無君之心而有無君之迹沈琨論宜興庇護屬員致與株繫諸生大獄又諫阻東巡蕭芝論端正風俗宜崇醇樸王甯輝論用人宜習其素不可因保舉遽加升用又論督撫壅蔽之習及士民捐輸之累州縣折收之患游光繹論大臣未盡和衷武備未盡整飭願效魏元成十思疏以裨治化諸人所言雖有用有不用當時皆推諱直又龔鏗當松筠因諫東巡獲罪密疏復陳自戕身後事而後上卒蒙寬宥其章疏多不傳稽之史牒旁見紀載謬誤盈廷稱盛事焉洪亮吉諸人身雖遭黜言多見採可以無憾或猶以時方清明曰亮吉之效痛哭流涕者爲多事過矣